

I. DISPOSICIÓN XERAIS

MINISTERIO DE XUSTIZA

12630 *Real decreto 892/2013, do 15 de novembro, polo que se regula o Rexistro Público Concursal.*

I

A publicidade dos concursos de acredores é unha consecuencia necesaria do carácter universal dos efectos do concurso de acredores que exige que o coñecemento da súa declaración e dos pormenores da súa tramitación chegue a todos os posibles interesados. É por iso que a Lei 22/2003, do 9 de xullo, concursal, prestou especial atención á publicidade do concurso de acredores, o que lles permitirá a estes coñecer non só a existencia dun concurso que os afecta senón tamén a de todas as resolucións que se aproben ao longo do proceso concursal e das anotacións que se deben efectuar nos rexistros públicos xurídicos de persoas e bens.

Os problemas que se foron detectando tras a entrada en vigor da Lei concursal puxeron de manifesto a necesidade de reforzar o papel que aquí ten que cumprir o Rexistro Público Concursal. O Real decreto lei 3/2009, do 27 de marzo, de medidas urxentes en materia tributaria, financeira e concursal ante a evolución da situación económica, xa modificou o artigo 198 da Lei concursal con esa finalidade. Igualmente, a Lei 38/2011, do 10 de outubro, de reforma da Lei 22/2003, do 9 de xullo, concursal, afondou nesta cuestión e modificou non só o artigo 198 senón tamén o 24, relativo á publicidade rexistral. Así mesmo, a Lei 14/2013, do 27 de setembro, de apoio aos emprendedores e á súa internacionalización, modificou a Lei concursal para engadir un novo título X que regula os chamados acordos extraxudiciais de pagamentos, para cuxa publicidade se creou unha nova sección no Rexistro Público Concursal.

O calado destas reformas obriga a establecer un réxime novo para o Rexistro Público Concursal que, por un lado, se adapte á súa nova configuración no artigo 198 da Lei concursal e, por outro, instaure os mecanismos de coordinación entre os diversos rexistros públicos que prevé o número 7 do artigo 24 da lei. Estes preceptos conteñen as novidades que explican o contido deste real decreto.

II

O Rexistro Público Concursal que agora se configura responde, en primeiro lugar, a un principio de unidade de información, de tal forma que tanto as resolucións procesuais que se adopten ao longo do proceso concursal como as que implican a apertura de negociacións para alcanzar os acordos extraxudiciais e a súa finalización, e os asentos rexistrais derivados destes, encontren un punto de encontro para os efectos da súa publicidade. O Rexistro é o instrumento que asegura esa coordinación entre os xulgados do mercantil e os distintos rexistros públicos, así como cos expedientes sobre acordos extraxudiciais de pagamentos.

E, en segundo lugar, que esa publicidade se obteña a través da internet, o que facilita a accesibilidade á información concursal. O resultado debe ser a posta á disposición dos interesados dunha información coordinada e completa.

A posta en marcha e o mantemento do Rexistro Público Concursal corresponde ao Ministerio de Xustiza, que lle encomenda a súa xestión ao Colexio de Rexistradores da Propiedade, Mercantís e de Bens Mobles de España. No que se refire ao funcionamento do Rexistro Público Concursal, son os xulgados, os rexistradores mercantís, os notarios e os rexistros públicos os que proporcionan a información dos distintos concursos e expedientes de acordo extraxudicial que se deben incorporar ao Rexistro.

Ao Rexistro Público Concursal correspóndelle o almacenamento e a sistematización de toda esa información, para facilitar a interconexión cos demais rexistros e cumprir así a función coordinadora prevista no número 7 do artigo 24 da Lei concursal.

A publicidade correspondente a cada procedemento producirase coa resolución pola cal se deixe constancia da comunicación de negociacións prevista no artigo 5 bis ou coa apertura de cada concurso, cuxo auto, igual que as demais resolucións que se adopten no proceso concursal, se remitirá ao Rexistro Público Concursal, así como aos correspondentes aos rexistros públicos que corresponda, dos cales procederá, pola súa vez, a información que integrará a sección segunda do Rexistro.

Outro tanto sucede coa publicidade correspondente á apertura de negociacións para alcanzar un acordo extraxudicial de pagamentos, que se producirá coa certificación ou copia da acta que acorde a dita apertura, e que, igual que os restantes anuncios, actas ou resolucións que se adopten sobre ese expediente, se remitirán ao Rexistro Público Concursal, así como aos correspondentes aos rexistros públicos que corresponda, dos cales procederá, pola súa vez, a información que integrará a sección segunda do Rexistro.

En cumprimento do artigo 24 da Lei concursal, os asentos que se practiquen como consecuencia das anteriores comunicacións nos distintos rexistros públicos remitiranse tamén ao Rexistro Público Concursal, de acordo cun criterio de integración e coherencia da información, á cal todos terán acceso. O mesmo sucederá para o xulgado que tramite o concurso, que irá dando publicidade ás resolucións que de acordo coa Lei concursal deben incluírse no Rexistro Público Concursal.

III

A estrutura do Rexistro Público Concursal é a que se establece no artigo 198 da Lei concursal e consta de tres seccións.

A sección primeira dará a publicidade correspondente ás resolucións procesuais ditadas durante o proceso concursal e ás que deba darse publicidade de acordo coa lei. Nesta sección inclúense tamén aquelas resolucións que ordene o xuíz ao abeiro do disposto no artigo 23.2 da Lei concursal.

A sección segunda contén as resolucións rexistradas anotadas nos distintos rexistros públicos, incluíndo as que declaren a culpabilidade do concursado e as que designen ou inhabiliten os administradores concursais.

A sección terceira, relativa aos acordos extraxudiciais, contén a información precisa sobre a iniciación e finalización dos procedementos para alcanzar os acordos extraxudiciais de pagamentos regulados no título X da Lei concursal, así como as previsións de publicidade edictal do proceso de homologación xudicial dos acordos de refinanciamento da disposición adicional cuarta da Lei concursal.

IV

Finalmente, este real decreto inclúe unha previsión relativa á interconexión do Rexistro Público Concursal cos rexistros de resolucións concursais dos restantes Estados membros da Unión Europea, a cal terá que realizarse de conformidade coas normas europeas que a regulen. Desta forma, no contexto europeo recoñécese o papel destes rexistros como unha fonte de información xurídica esencial para facilitar as xestións de cidadáns, xuristas, administracións públicas, empresas e outros interesados. Estes rexistros permítenlles aos bancos, aos acredores, aos socios comerciais e aos consumidores acceder á información oficial e fiable sobre casos de insolvencia, garantindo a transparencia e a seguridade xurídica nos mercados da Unión Europea. Esta previsión reflíctese tamén na regulación da sección primeira do rexistro, en que se prevé a publicidade da apertura dun procedemento de insolvencia aberto noutro Estado membro cando así o inste o síndico do dito concurso.

Con esta nova regulación, o Rexistro Público Concursal configúrase como unha ferramenta á disposición dos diversos acredores do concursado e tamén da Administración de xustiza, que conta cun instrumento que lle facilita a comunicación das resolucións que

adopten os xulgados do mercantil aos distintos rexistros públicos, o coñecemento doutras situacións concursais con que poida gardar conexión e dos expedientes de negociación dos acordos extraxudiciais de pagamento. Todo iso debe contribuír á mellora da seguridade xurídica no que concirne aos concursos de acredores ou aos seus procedementos preventivos e a unha maior axilidade procesual.

Na súa virtude, por proposta do ministro de Xustiza, de acordo co Consello de Estado e logo de deliberación do Consello de Ministros na súa reunión do día 15 de novembro de 2013,

DISPOÑO:

CAPÍTULO I

Das disposicións xerais para o funcionamento do Rexistro Público Concursal

Artigo 1. Obxecto e finalidade.

1. Este real decreto contén o réxime de funcionamento do Rexistro Público Concursal, co obxecto de asegurar a difusión e publicidade das resolucións procesuais ditadas ao abeiro da Lei 22/2003, do 9 de xullo, concursal, e dos asentos rexistrados derivados do proceso concursal, así como os mecanismos de coordinación entre os diversos rexistros públicos en que deban constar a declaración do concurso e as súas vicisitudes.

2. O réxime de funcionamento do Rexistro Público Concursal asegurará a difusión, coordinación e publicidade das actas, anuncios e resolucións procesuais ditadas ao abeiro da Lei 22/2003, do 9 de xullo, concursal, sobre os acordos extraxudiciais, o procedemento de homologación e dos asentos rexistrados derivados destes.

Artigo 2. Xestión e organización do Rexistro Público Concursal.

1. A publicidade das resolucións concursais publicadas no Rexistro Público Concursal realizarase a través dun portal na internet que se localizará dentro da sede electrónica que determine o Ministerio de Xustiza.

2. O Rexistro Público Concursal depende do Ministerio de Xustiza e encóntrase adscrito á Dirección Xeral dos Rexistros e do Notariado, á cal corresponde ditar cantos actos ou resolucións de carácter xurídico e técnico dean soporte á actividade do Rexistro.

3. A xestión material do servizo de publicidade encoméndaselle ao Colexio de Rexistradores da Propiedade, Mercantís e de Bens Mobles de España, que a realizará ás súas expensas e baixo a dependencia do Ministerio de Xustiza.

4. As comunicacións que se efectúen a través do Rexistro Público Concursal serán sempre electrónicas e utilizaranse canles de comunicación securizadas. As comunicacións deberán asegurar a seguridade e a integridade do seu contido. Só en caso de imposibilidade de empregar medios electrónicos se poderán efectuar as comunicacións a través doutro medio, de acordo coa lexislación que resulte aplicable, que asegure, así mesmo, a seguridade e integridade do seu contido.

Artigo 3. Acceso á información do Rexistro Público Concursal.

1. O acceso ao Rexistro Público Concursal será público, gratuíto e permanente, sen que requira xustificar ou manifestar ningún interese lexítimo.

2. As resolucións procesuais publicaranse no Rexistro en extracto, que incluírá os datos indispensables para a determinación do seu contido e alcance, con indicación dos datos rexistrables cando aquelas causasen anotación ou inscrición nos correspondentes rexistros públicos.

Adoptaranse medidas orientadas a evitar a indexación e a recuperación automática dos datos contidos no Rexistro a través de motores de busca desde a internet.

3. No caso de que a resolución publicable nas seccións primeira e terceira sexa susceptible de inscrición nun rexistro público de persoas, indicárase que a inscrición ou anotación está pendente ou, unha vez que se acceda ao certificado correspondente á sección segunda, que a resolución en cuestión causou asento de inscrición ou anotación con referencia aos correspondentes datos rexistrais.

4. O Rexistro conterá un dispositivo de selaxe temporal que permita acreditar dun xeito auténtico o inicio da difusión pública das resolucións ou a información que se inclúa nel.

5. A publicidade das inhabilitacións contidas nas sentenzas de cualificación que non sexan firmes só será accesible para os órganos xurisdicionais e as administracións públicas habilitadas legalmente para solicitaren a información necesaria para o exercicio das súas funcións, a menos que, non sendo firmes, tivesen acceso ao Rexistro Mercantil ou a outros rexistros públicos de persoas. Para estes efectos, o director xeral dos Rexistros e do Notariado, en colaboración cos responsables dos distintos rexistros públicos e de conformidade co Consello Xeral do Poder Xudicial, adoptará as medidas necesarias para asegurar a identidade dos solicitantes de información.

Artigo 4. *Estrutura e contido do Rexistro.*

1. O portal estrutúrase en tres seccións:

- a) Sección primeira, de edictos concursais.
- b) Sección segunda, de publicidade rexistral de resolucións concursais.
- c) Sección terceira, de acordos extraxudiciais.

2. A publicidade tanto da primeira coma da segunda sección permitirá realizar consultas en atención ao nome, denominación ou número de identificación fiscal do debedor ou concursado e, con referencia aos correspondentes concursos e resolucións procesuais, polo nome ou denominación das persoas físicas ou xurídicas que fosen nomeadas ou separadas como administradores concursais, así como polo número de autos e o número de identificación xeral do procedemento e do xulgado competente. Respecto das inhabilitacións das persoas afectadas pola cualificación do concurso como culpable, inserírase a parte dispositiva da sentenza de cualificación que as acordou.

3. A sección terceira comprenderá a información e os anuncios que se regulan no capítulo IV. A súa publicidade permitirá realizar consultas en atención ao nome ou á denominación do debedor e, con referencia aos correspondentes expedientes, polo nome ou denominación do mediador concursal que aceptasen, así como polo número de identificación fiscal, o número de expediente ou procedemento e o notario ou rexistrador mercantil que o tramite; no caso de procedementos de homologación, polo número de autos e o número de identificación xeral do procedemento e do xulgado competente.

Artigo 5. *Protección de datos persoais.*

Para os efectos do establecido pola normativa de protección de datos de carácter persoal:

- a) A finalidade e o uso dos datos incorporados ao Rexistro Público Concursal son os previstos na Lei concursal, sen que se poidan empregar para un fin distinto.
- b) As persoas das cales se obterán datos serán as declaradas en concurso e todas aquelas a que se refiran as resolucións que se publican de conformidade coa Lei concursal que non son concursadas.
- c) Os datos serán os remitidos polos xulgados do mercantil, os rexistradores mercantís, os notarios e polos rexistros públicos en que se realicen os asentos previstos na Lei concursal.

d) A estrutura do Rexistro e os datos persoais incluídos nel axustaranse ao establecido nos artigos 3 e 4.

e) Os datos indicados serán públicos, conforme o artigo 198 da Lei 22/2003, do 9 de xullo, na forma indicada no artigo 6 deste real decreto.

f) O responsable do Rexistro Público Concursal é o Ministerio de Xustiza.

g) O encargado do tratamento dos datos do Rexistro Público Concursal é o Colexio de Rexistradores da Propiedade, Mercantís e de Bens Mobles de España e ante el exerceranse dereitos de acceso, rectificación, cancelación e oposición.

h) Aplicaráselles aos datos incorporados ao Rexistro Público Concursal as medidas de seguridade de nivel medio.

Artigo 6. *Duración da publicidade no Rexistro Público Concursal e cancelación dos seus datos.*

Os datos de carácter persoal incluídos nas resolucións concursais e nos asentos rexistrados inseridos no Rexistro Público Concursal en calquera das súas seccións serán cancelados dentro do mes seguinte a aquel en que finalicen os seus efectos, sen prexuízo da súa disociación para a súa utilización posterior. En concreto:

a) Os datos relativos ás sentenzas firmes en que se ordena a inhabilitación para administrar bens alleos, así como para representar calquera persoa nos termos previstos no punto 2.º do número 2 do artigo 172 da Lei concursal, serán cancelados de oficio no prazo de dous meses contados desde que transcorrese o período de inhabilitación establecido na mesma sentenza.

b) Tamén se cancelarán de oficio dentro do mesmo prazo anterior os datos relativos á inhabilitación temporal para ser nomeado administrador noutros concursos nos termos previstos no número 4 do artigo 181 da Lei concursal e unha vez que rematen os efectos da inhabilitación segundo o que se establece na sentenza de desaprobação de contas.

c) Os datos relativos ao cesamento dos administradores concursais ou auxiliares delegados en aplicación do que establecen os artigos 37, 151, 152 e 153 da Lei concursal cancelaranse transcorrido un prazo de tres anos desde a firmeza do auto ou da resolución xudicial.

d) Os datos relativos ao acordo extraxudicial de pagamentos cancelaranse de oficio unha vez transcorridos dous meses desde a publicación da acta notarial de cumprimento do plan de pagamentos ou desde a firmeza da resolución xudicial que declare a conclusión do concurso consecutivo.

CAPÍTULO II

Da sección primeira, edictos concursais

Artigo 7. *Contido da sección primeira do Rexistro Público Concursal.*

1. Na sección primeira, de edictos concursais, do Rexistro Público Concursal inseriranse, ordenadas por debedor ou concursado e dentro de cada procedemento por data da súa adopción, a resolución pola cal se deixe constancia da comunicación de negociación prevista no artigo 5 bis e as resolucións procesuais que deban publicarse conforme o previsto no artigo 23 da Lei concursal e demais preceptos que a aquel se lle remiten.

2. Na sección primeira do Rexistro inseriranse tamén as resolucións correspondentes ao proceso concursal ás cales, por decisión xudicial, se deba dar publicidade de acordo coa Lei concursal.

3. Tamén se lle dará publicidade nesta sección á apertura dun procedemento de insolvencia aberto noutro Estado membro da Unión Europea cando así o solicite o síndico designado polo tribunal competente dese Estado ou, de ser o caso, o propio

tribunal, conforme o disposto na normativa da Unión Europea sobre procedementos de insolvencia.

Artigo 8. Remisión das resolucións procesuais ao Rexistro Público Concursal.

1. O persoal do Xulgado do Mercantil remitirá as resolucións que se deban publicar na sección primeira do Rexistro Público Concursal desde os sistemas de xestión procesual, baixo a dirección do secretario xudicial, a través da aplicación electrónica e o modelo que o Rexistro poñerá á súa disposición.

Non obstante, cando non sexa posible o traslado das resolucións a través da aplicación electrónica, estas seranlle entregadas ao procurador do solicitante do concurso, que de inmediato os remitirá ao Rexistro Público Concursal. Nestes casos, cando o concurso o solicitase unha Administración pública que actuase representada e defendida polos seus servizos xurídicos, a inserción das resolucións xudiciais farase en virtude de mandamento remitido polo secretario xudicial ao Rexistro.

2. En relación con cada unha das resolucións obxecto de publicidade na sección primeira, o documento remitido conterá os seguintes datos:

- a) Clase de resolución procesual en atención ao seu contido tipificado.
- b) Identidade do debedor ou concursado polo seu nome ou denominación social e polo número de identidade fiscal, se o tiver. En caso de concurso de acredores declarado conxuntamente ou acumulado, expresarase esta circunstancia con identificación dos demais concursados.
- c) A denominación e o número de xulgado, do tribunal ou oficina xudicial que a tiver ditado, a identidade do xuíz ou, en caso de tribunais colexiados, do relator ou do secretario xudicial cando se trate dun decreto, o número de autos e a data da resolución, con expresa indicación de se é ou non firme.
- d) O contido literal do edicto.
- e) Sinatura do secretario.

Artigo 9. Remisión das resolucións procesuais aos rexistros públicos e a outros rexistros.

1. Correspóndelle ao persoal do Xulgado do Mercantil, baixo a dirección do secretario xudicial, remitirles as resolucións que se diten no seu xulgado aos rexistros públicos de persoas e de bens nos cales deban aquelas inscribirse ou anotarse a través da aplicación electrónica e co modelo que o Rexistro porá á súa disposición. Para tal efecto, para o cumprimento electrónico dos trámites fiscais e rexistrais e, eventualmente, para a emenda dos defectos advertidos na cualificación, poderá solicitarse a tramitación telemática a través de calquera profesional colaborador da Administración de xustiza que conte cos medios adecuados.

Non obstante, cando non sexa posible o traslado das resolucións a través da aplicación electrónica, será de aplicación o disposto no número 1 do artigo anterior.

2. Se os datos que constan nas actuacións e o mandamento se refiren a un suxeito inscribible no Rexistro Mercantil, o secretario xudicial, na forma e cos requisitos previstos no número anterior, solicitará do rexistrador mercantil competente que remita, o mesmo día en que se practicase o correspondente asento, certificación telemática do contido da resolución ditada polo xuíz do concurso ao Rexistro da Propiedade, ao Rexistro de Bens Móbiles ou a calquera outro rexistro público de bens competente, de conformidade co previsto no Regulamento do Rexistro Mercantil.

3. De igual xeito, o persoal da oficina xudicial, baixo a dirección do secretario xudicial, remitirá, en función da natureza do concursado, as resolucións a calquera outro rexistro en que se encontre inscrito, incluídos os rexistros administrativos.

CAPÍTULO III

Da sección segunda, publicidade rexistral

Artigo 10. *Contido da sección segunda do Rexistro Público Concursal.*

Na sección segunda, de publicidade rexistral, faranse constar en extracto e ordenadas por concursado e datas as resolucións rexistrais anotadas ou inscritas en todos os rexistros públicos de persoas referidos nos números 1, 2 e 3 do artigo 24 da Lei concursal, incluídos os asentos rexistrais relativos ás sentenzas que declaren concursados culpables ou acorden a designación ou inhabilitación dos administradores concursais, e en virtude de certificacións remitidas de oficio polo encargado do Rexistro unha vez practicado o correspondente asento.

Tamén se farán constar na mesma forma as resolucións rexistrais anotadas ou inscritas nos rexistros públicos de persoas indicados no número 3 do artigo 233 da Lei concursal.

Artigo 11. *Remisión de asentos dos rexistros públicos ao Rexistro Público Concursal.*

1. O mesmo día en que se tiver practicado a inscrición ou anotación preventiva das resolucións que se deban publicar na sección segunda, o rexistrador competente que estiver a cargo do correspondente rexistro público a que se refire o artigo 24 da Lei concursal expedirá unha certificación en extracto do contido do asento autorizada coa súa sinatura e remitiráa ao Rexistro Público Concursal.

2. A certificación en extracto do rexistrador axustarase ao formato que proporcione o Rexistro Público Concursal e conterá a indicación do tipo de asento practicado e os datos de inscrición.

3. O encargado do Rexistro Público Concursal comprobará que a remisión permite a inserción da resolución na sección segunda do Rexistro e, se é o caso, comunicará os defectos que impiden a súa difusión para os efectos de publicidade noticia. A inserción debe practicarse en formato estandarizado no mesmo día da recepción, con excepción dos supostos en que o documento ingrese no Rexistro en soporte papel, caso en que a súa publicidade se producirá dentro dos dous días hábiles seguintes.

CAPÍTULO IV

Da sección terceira, acordos extraxudiciais

Artigo 12. *Contido da sección terceira do Rexistro Público Concursal.*

1. Na sección terceira, de acordos extraxudiciais, faranse constar, ordenados por debedor, os procedementos para alcanzar un acordo extraxudicial de pagamentos, con indicación do nome ou da denominación do debedor e do mediador concursal, do número de identificación fiscal de ambos os dous, das datas de solicitude, de apertura do expediente, de inicio e de finalización de negociacións, así como a información que se indica nos artigos seguintes.

2. Na sección terceira, ordenadas por entidades debedoras, publicarase o anuncio co extracto do decreto do secretario xudicial polo cal se admite a trámite a solicitude da homologación, do auto xudicial polo que se aprobe a homologación dos acordos de refinanciamento e da sentenza que resolva sobre a impugnación da homologación nos termos previstos na disposición adicional cuarta da Lei concursal.

Artigo 13. *Remisión de información ao Rexistro Público Concursal.*

1. O notario ou o rexistrador mercantil remitiralle certificación ou copia da acta ao Rexistro Público Concursal para a súa publicación na sección terceira da apertura do expediente, e debe indicar:

- a) A identidade do debedor, incluído o seu número de identificación fiscal.
- b) A data en que se presentou a solicitude do debedor.
- c) A data en que se admitiu a apertura do procedemento.
- d) A data de aceptación do mediador concursal.
- e) A identidade do mediador concursal, incluído o seu número de identificación fiscal e o enderezo electrónico en que os acredores poderán realizar calquera comunicación ou notificación.

2. O notario ou o rexistrador mercantil comunicaralle ao Rexistro Público Concursal a finalización das negociacións.

Nos supostos do número 6 do artigo 235, o número 4 do artigo 236 e o número 3 do artigo 238, unha vez que o mediador concursal faga constar estas circunstancias por acta, o notario ou rexistrador mercantil comunicará a data do peche do expediente e, se é o caso, se se solicitou declaración de concurso.

3. A información sinalada neste precepto que debe remitir o notario ou rexistrador mercantil axustarase ao formato que proporcione o Rexistro Público Concursal.

Artigo 14. *Publicidade do acordo extraxudicial de pagamentos e as súas incidencias.*

1. Cando as negociacións conclúan coa adopción dun acordo extraxudicial de pagamentos, o notario ou rexistrador remitirá para a súa publicación no Rexistro Público Concursal anuncio que conterá os datos que identifiquen o debedor, incluído o seu número de identificación fiscal, o notario ou rexistrador competente, o número de expediente de nomeamento do mediador, o nome do mediador concursal, incluído o seu número de identificación fiscal, e a indicación de que o expediente está á disposición dos acredores interesados no Rexistro Mercantil ou notaría correspondente para a publicidade do seu contido.

2. No caso de anulación por sentenza do acordo extraxudicial de pagamentos, a dita resolución será remitida para a súa publicación na sección terceira do Rexistro Público Concursal desde os sistemas de xestión procesual polo persoal do Xulgado do Mercantil, baixo a dirección do secretario xudicial, na forma prevista no capítulo II.

3. Cando o plan de pagamentos incluído no acordo extraxudicial for integramente cumprido, o notario que levante a acta prevista no artigo 241 da Lei concursal remitirá ao Rexistro Público Concursal para a súa publicación na sección terceira, de conformidade co formato que proporcione o Rexistro.

4. Cando o acordo extraxudicial de pagamentos for incumplido, unha vez que o mediador concursal faga constar esta circunstancia por acta, o notario ou o rexistrador mercantil comunicarllo ao Rexistro Público Concursal. En todo caso, a publicación na sección primeira do Rexistro Público Concursal da declaración de concurso prevista no artigo 241 da Lei concursal publicarase igualmente na sección terceira, de conformidade co formato que proporcione o Rexistro.

5. En caso de imposibilidade de alcanzar un acordo extraxudicial de pagamentos ou de incumprimento do plan de pagamentos aprobado, a resolución que declare o concurso consecutivo, nos termos do artigo 242 da Lei concursal, publicarase na forma prevista no capítulo II. A dita publicación determinará o peche da sección terceira.

Artigo 15. *Publicidade da homologación dos acordos de refinanciamento.*

1. Para a remisión ao Rexistro Público Concursal das resolucións procesuais relativas á homologación dos acordos de refinanciamento e da sentenza que resolva sobre a impugnación da homologación será de aplicación o previsto no artigo 8.

2. Cando por sentenza se declare a anulación da homologación ou o incumprimento do acordo de refinanciamento homologado, a dita resolución será remitida para a súa publicación na sección terceira do Rexistro Público Concursal desde os sistemas de xestión procesual polo persoal do Xulgado do Mercantil, baixo a dirección do secretario xudicial, na forma prevista no capítulo II.

Disposición adicional primeira. *Interconexión cos rexistros de resolucións concursais da Unión Europea.*

De conformidade coas normas da Unión Europea que o regulen, o Rexistro Público Concursal poderá conectarse cos rexistros de resolucións concursais dos demais Estados membros, así como coas plataformas comunitarias que para o efecto se establezan, co obxecto de facilitar as consultas en materia concursal na Unión Europea e de permitir o coñecemento dos procesos concursais neste ámbito, cos efectos que se prevexan.

O acceso ao rexistro concursal desde a plataforma disposta para o efecto pola Unión Europea rexerese pola súa normativa específica.

Disposición adicional segunda. *Estatística concursal.*

Habílitase o Colexio de Rexistradores da Propiedade, Mercantís e de Bens Mobles de España para que elabore anualmente unha estatística concursal, que se remitirá ao Instituto Nacional de Estatística e á Comisión Nacional de Estatística Xudicial. Para tal fin, coordinarase a actuación do Colexio de Rexistradores co Instituto Nacional de Estatística, contando coa colaboración que presta o Consello Xeral do Poder Xudicial para a elaboración de estatísticas en materia concursal.

Por resolución conxunta da Dirección Xeral dos Rexistros e do Notariado e do Instituto Nacional de Estatística establecerase o contido e o procedemento de envío a este último da información relevante para os efectos do cumprimento das súas funcións.

Disposición transitoria primeira. *Resolucións concursais anteriores a este real decreto.*

1. O Ministerio de Xustiza adoptará as medidas necesarias para incluír no Rexistro Público Concursal o contido das resolucións concursais correspondentes a procesos que non rematasen na data da súa entrada en vigor.

2. Ata a implantación definitiva do Rexistro Público Concursal seguirá subsistente o sistema de publicidade concursal regulado no Real decreto 685/2005, do 10 de xuño.

Disposición transitoria segunda. *Sistema de envío automático.*

En canto as condicións técnicas o permitan, a transmisión da información prevista neste real decreto realizarase directamente desde as aplicacións de xestión procesual, na forma que regulamentariamente se determine.

Disposición derogatoria única. *Derogación normativa do Real decreto 685/2005, do 10 de xuño.*

Queda derogado o Real decreto 685/2005, do 10 de xuño, sobre publicidade de resolucións concursais e polo que se modifica o Regulamento do Rexistro Mercantil, aprobado polo Real decreto 1784/1996, do 19 de xullo, en materia de publicidade rexistral das resolucións concursais, sen prexuízo da súa aplicación provisional nos termos do número 2 da disposición transitoria primeira.

Tamén quedan derogadas cantas disposicións de igual ou inferior rango resulten contraditorias e incompatibles coa regulación que se contén neste real decreto.

Disposición derradeira primeira. *Habilitación ao ministro de Xustiza.*

Habílase o ministro de Xustiza para ditar cantas normas sexan necesarias para a execución do disposto neste real decreto.

Disposición derradeira segunda. *Competencia do Estado.*

Este real decreto dítase en virtude das competencias que lle atribúe ao Estado o artigo 149.1.6.^a e 8.^a da Constitución española en materia de lexislación mercantil e de ordenación dos rexistros e instrumentos públicos.

Disposición derradeira terceira. *Entrada en vigor.*

Este real decreto entrará en vigor aos tres meses da súa publicación no «Boletín Oficial del Estado».

Dado en Madrid o 15 de novembro de 2013.

JUAN CARLOS R.

O ministro de Xustiza
ALBERTO RUÍZ-GALLARDÓN JIMÉNEZ